

Polgo Pas Taitusbolo Aseani

Hasia nedebo tau sabo po

Te bidi Taitus aga te Juda hani bidi meni. Tiali goli aga te Godigo po wali pabo bidi pedelali sogo, agai te bidi Pol te po sela pabo seḏe tau sabo seḏe yai dao. Te Grik dabego moni tḡ sesegede te genuai tamu aḡ elalubao, tama te tamu aḡ tomode te tḡ me nogi Krit te elalubao. Tama te bidi Pol dali, Taitus dali augwali si te bulu tḡ Kritba pelama, tama Kraisinde gesi dwagi yai po pusa mani. Te po pusa menama, tama te Krit we bidi mebago te po odama, homu begelama tama Kraisgo po wali pabo we bidi hani tede pedalali. Tama nosali te bidi Pol gasa buluba painogo eyu, tama agai te bidi Taitus te Krit bulude taga soyu, te bidi Taitus te we bidi hanide tobolu bidi nigilali. Tama te bidi Pol nosali e pas te Taitusbolo tolali. Te bidi Polgo homugo te Taitus agai te Krit moni tḡ tomode te tigidali hanude te Kraisgo po wali pabo we bidi hani tonalubo tau sabo bidi dabe dodolama augwa seḓa muao. Tama te we bidi dabe me augwaligo yabo wiegi yai kolesaga po me Polgo e pas tomode aseḓama tama tolali.

Te bidi Taitusgo te tḡ ailan Kritde te Godigo po wali pabo bidi dabego konealubo po daḡ waliyu, te augwaligo kolesaga dodolobo seḓe yali po

(Daḡ 1-3)

1 ¹Ena Pol dao, tama ena Godigo seḓe ebo bidi dao. Ena te Jisas Kraisgo po sela pabo seḓe ebo bidi ena dao. Agai ena diḡ selama tama tagala palama, tama eno te Godigo hagea sai we bidi augwaligo te agade konealubo po augwa homude eno bomo iligi pao ena dali te po wai, tama eno augwali tau siyu elama, tama augwaligo Godigo mu po selama, tama augwali aga tiwai bidimainogo agai ena te seḓe mani. ²Tama te mu po page e dao: God agai tibo po munu me wabo meni, tama polobadu mu agai tigidali nai nigisiḡbadi tama agai te sesemane sogo bidada pabo bidibo ula dabolo mawaibao te po agai olama tama daḡ wali. Tama tibaso, megi dago te mu po odolama, tama dwagi yai homu eyu, te bidabo ula sabo sogo tonaluyu bidibo dao. ³Tama polobadu mu agai te po daḡ

olama, tama tamadi te sogo aga digi bodolu mawai sogo agai bidi meba homu hodolama, tama agai po aga augwalibolo hania ola mani. Tama elama, tama agai te po pusubo şe eno nogoba muai dao, tama te da ma dobola sabo bidi God agai te po ola mao obaso, tama eno te mu po te we bidibolo ola mabo dao.

⁴Taitus nage dali eno e po aşena tolobao. Te da dali, nage dali da tigidaligo God dali, Kraiss dali te konealubo po deli naga elalubaso, tama nage eno ogwa mu tiwai dao. Tama eno homugo dago Aya God dali, Kraiss Jisas dali augwali sigo nagebolo te olo tau sabo kolesagago dwagi yai şe eyu elama, tama nago homu nagamea peyu bugagia bidao.

**Polgo Taitusbolo şe mani, te Godigo we bidi tomode tonalubo
şe yabo tobolu bidi polalubo bidi dabe nigilimainu yali**

⁵Eno nage taga soayu, tama nage te Krit moni tşde bidibadi ena soai dao, nage eno taga soali te po pagede tama dao: eno homugo nago te tigidali dodoloyu silisşawani şe te şe nago dodolomainogo tiwai dao. Tama tiyu, nago tigidali hanu deli delide te Godigo po wali pabo we bidi hani augwa tobolu bidi nigilao, te eno polobadu nage dali wali po gilamao.

⁶Tama nago te tobolu bidi nigibo si te pode ma kone palao: niwai bidi me deli te we bidi gedude agai dwai kolesaga isişwai bidi yai baso da, tama agai we me deli digi yai baso da, tama agai wai dabe augwaligo Godide konealubo po daş wai yai baso da, tama augwaligo dwai şe subigila yai po meni baso da, tama augwaligo ida de aya sigo po sela sasişwai yai baso da, tama te tiwai bidi nago augwali tobolu bidi nigilao. ⁷Magi baso meni, te Godigo we bidi tonalubo bidi te bidi agai Godigo şe tonalubo dao. Tama tibaso, te bidi aga dolo bugagia bilao, şeş meni yai bidi bidao. Agai hagoma ebo kolesaga ebo bidi bidilamuo, tama agai şeş polo me elamuo. Agai bomai aşı hauwa tubo bidi menio, tama agai bidi dabe me elebo menio. Tama agai masigi dabe hauwa sabo homu eyu pesa ebo bidi menio. ⁸Te menio. Tiali goli gasa buludu asobo we bidi agai augwali dali dwagi yai homu eyu bugagia gesebo bidi bidao. Tama agai dwagi yai kolesaga naga godolo eyu, tama tiyu dwagi yai homu dali yao. Aga homu keşnai bidi bidao. Aga te doloba pai bidi bidiyu, tama Godigo gedude aga dwagi yai bidi bidao. Aga digi aga bidibo te kolesaga bugagia tonalua.

⁹Te Godigo po da te wiegi yai tulalusişbo po dao, tama te Godigo we bidi tonalubo bidi agai te po odolama, tama agai te po aga homugo daş wao. Tama tiyu da, teda agai te ola mabo pogo te gasa we bidi tau siyu, augwaligo homu bomu ilibo usu yaibao. Me ma, agai te po sela şabo bidi dabe dali po miyu, tama augwaligo te pode geda muani kolesaga agai augwalibolo ola mabo usu yaibao.^a

^a 1:9 1 Ti 3:2-7

¹⁰Magi baso meni. Te Krit t̄de te Godigo we bidi hani tomode te bidi hauwa augwaligo te tobolu bidigo po odogobeo, tama te po wali pabo hagela ebo dao. Augwaligo page meni yai olo po naga weyu, gasa bidi dabe tibo po ola mabo dao. Te tama tebo bidi dabe hauwa augwali te Juda bage dao. Augwaligo polobadu Kraide konealubo po daŋ wali goli, augwaligo homugo te da tigidaligo te Juda dabego bomo yai po me wali pomainao. ¹¹Tama augwaligo gasa bidi dabego mone masigi bomo elama sainogo eyu, tama augwaligo te ola masiabo po ola mabo dao. Te usu meni. Tama tebogo augwaligo te we bidi hani meba tomode si bugulama, tama we bidi meba augwaligo Godigo po megi bugagia wali me pabo meni. Tama tibaso, te nago nigilibo tonalubo bidi dabe augwaligo te olo po ola mabo bagego pedauwali daŋ wao. ¹²Polobadu mu Krit bulu bidi me deli, te bidi agai haniani po page mu koneai bidi bidai. Tama te bidi agai te po wai, “Te Krit t̄de bidibo bidi dabe augwali tigidali sogo te tibo po wabo bidi hani bidibo dao. Augwali uni sulai kibu tiwai dao. Tama augwaligo nai hauwa tulama, tama se ebo hagela ebo bidi dabe dao,” te Krit bidi aga digi agai te po polobadu mu wai dao. ¹³Tama agai po mu tama dao. Tama tibaso, augwaligo te God dali konealubo po augwa homugo bugagia dolo mu ma daŋ omainogo nago augwali dali po bomo elama te po wao, “Te gasagi yai po ola mabo tagalao. ¹⁴Te Juda dabego haniani olo namu po dali, te bidi dabego olo nigali bomo yai po dabe me, te tagalao. Te tobage po page bidi augwali da te Godigo mu po tudiba muani bage dao. Tama tibaso, dagego te tobage olo po wali pabo tagalao,” nago augwalibolo te po wao. ¹⁵Te homu kolesaga meda meni yai bidi dabe augwaligo gedude te tigidali nai te habu selisawai nai naga dao. Tiali goli te dwai meda yai homu elalubo bage, augwaligo God dali konealubo po daŋ wasiawai bage augwalide magi se dwagi yai me ebo, augwaligo dwagi yai kolesaga ebo page konebo menio. Magi baso meni. Augwaligo homu kolesaga dali, augwa dwai se dwagi yai se dagalabo homu me, te si dolama tama dwai meda elama elalubao. ¹⁶Augwaligo pedauwaligo naga te po wabo dao, “Eno God koneai dao,” te po wabo. Tiali goli augwaligo bilibo kolesaga ebogo te God hogwa sabo dao. Godigo augwali me godolo ebo menio, hagela mu ebo. Augwali agai po sela sabo bidi dao, tama augwaligo dwagi yai kolesaga me deli ebo usu meni.

**Te monu dabego te Godigo godolo yabo kolesaga bugagia
wali peyu, te wiegi yai kolesaga ola mabo po wao**

2 ¹Te dwai po ola mabo bage augwali te tiwai bidibo dao. Tiali goli nage, nago te Godigo wiegi yai po wali pabo we bidigo yabo kolesaga ola mabo po nago bugagia ola mao. ²Tama tiyu, nago augwalibolo e tobo wao: monu dabe yai bidi augwaligo te bomai aŋ

hauwa tulumuo, augwaligo augwa tigigo ebo kolesaga bugagia tonalualo. Augwaligo doloba pai homu kolesaga naga koneyu, tama augwa homu kolesaga bugagia tonalualo, te po wao. Tama te God dali konealubo pode augwaligo te po page kuna koneyu bidao. Tama tiyu, augwaligo God dali, gasa we bidi dali dwagi yai homu ebo kolesaga eyu, tama tigidali sege yai se asobadi bomo elama dolalubo kolesaga selama bidao, te po te monu dabebolo ola mao. ³Te mosi dabe yai we augwalibolo me te po wao, augwaligo te dwai se isiabo wego ebo kolesaga dolo wali pao. Tama tiyu augwaligo te we bidi nogi posobo po wagio, augwali bomai ai tubo se te dologode bidigio, te po wao. Tama augwaligo te gesi we dabe sibibolo dwagi yai kolesaga ola mao. ⁴Tama tiyu augwaligo te gesi we dabebolo te po wao, “Dagego duga bidi dali, wai dabe dali dwagi yai homu eyu godolo yao.” ⁵Gasa we bidi augwaligo te gesi we dabego ebo kolesaga sulama, tama augwaligo Godigo po dali dwai posobo po waidali weyu, tama te mosi dabe yai we augwaligo te gesi we dabebolo e po me ola mao: “Dagego duga digi bidibo homu kolesaga bugagia tonalualo, tama dwai penane se ebo homu egimio, tama dagego bidibo be tonalubo se bugagia yao, tama dagego duga bidi dali wai dabe dali dwagi yai se eyu bidao. Dage duga bidi dologode bidao,” te tobage po te augwaligo te gesi we dabebolo ola mao wao.

⁶Te gesi bidi dabe augwalibolo me ola mayu, tama augwalibolo wao, “Dagego duga tigigo ebo kolesaga bugagia tonalualo,” te po wao. ⁷Tama naga digi nago ebo kolesaga tigidali ebogo te nago te gesi bidi dabebolo dwagi yai kolesaga naga tama ola mao. Tama tiyu, nago homu mu eyu, tama ‘E po sege yai po dao,’ te homu eyu elama, tama Godigo po ola mao. ⁸Tama nago agai po ola mabo si te dolo po naga augwali dali wao. Tama tiyu da, teda nage dali boi bidi homu ebo bage augwaligo da dali, te nago ola mabo po dali, tede augwaligo dwai po me wabo usu sabaso, tama augwali hale yaibao.

⁹Nago te masigi sisawai olo se bidi augwalibolo te po wao: augwaligo tigidali se ebode te augwa tonalubo bidigo augwali dali dwagi yai homu emainogo tama augwaligo augwa tonalubo bidigo po odolama, tama augwali dologode naga bidao. Tama augwaligo augwa tonalubo bidi dabebolo po wei ponoyu te dwai po me olamuo. ¹⁰Te tonalubo bidigo nai dabe me wi selamuo. Te menio. Te doloba pai kolesaga naga eyu, tama augwa tonalubo bidi dabe dali homu kea pai bidigo ebo kolesaga te tonalubo bagebolo augwaligo tama yao ola mao. Te se ebo bidi dabebolo te po wao. Tama tiyu da, teda augwaligo tigidali se ebogo te da ma dobola sabo bidi God agade ola mabo po augwaligo te gasa bidigo gedude ugwaba siyu au eyu yaibao.

¹¹Magi baso meni. Tigidali we bidi agai ma dobola somainogo eyu, tama Godigo agai da olo tau sabo wiegi yai kolesaga hania waselai dao.

¹²Tama da tçde we bidi dago Godigo bomai po tudiba muyu, tama te dwai dwai kolesaga eyu bidai dao. Tiali goli agai olo tau sabo wiegi yai kolesaga tego da e tiwai ola mabo dao: “Dagego te dwai şe tudiba muao, te doloba pai kolesaga naga yao, tama dage e tçde bidibadi te Godigo gedude dwagi yai we bidi bidao.” ¹³Tama dago te ola mani po odolama, tama te tiwai kolesaga eyu bidibadi, tama dwagi yai homu eyu, te wiegi yai sogo asobo dago tonalubo dao. Tama te sogo asobo si, teda dago genuai God te da ma dobola sali bidi Jisas Kraiss agai bomo yai ula dali, genuai nogi dali, te hania ulaba pedalaibao. ¹⁴Aga digi aga bidibo ula tagalai dao, tama agai te bidibo ulago da ma abelama, tama dago te tigidali bomo yai po sela şabo te kolesaga agai sela şawainogo tama yai dao. Agai da penama, tama da we bidi aga hani mu pedalainogo te şe yai, tama dago tigidali dwagi yai kolesaga bomo elama te şe naga emainogo agai aga bidibo ula tagalai dao.^b

¹⁵Nago eno megi wali ola mabo po te po te we bidi dabe dali nago te po ola mao. Nago augwali te pogo hodolama, tama augwaligo te po wali pomainao. Tama nago te po sela şanama wali pişabo bidi augwaligo homu begelemainu nago augwali dali po bomo elama wao. Te bidi dabe augwaligo nage olo bidi yaliwe te homu idali weyu tama nago te ola mabo po bugagia bomonama augwalibolo ola mao.

Godigo wiegi yai şe mu dade yali, tama dago dwagi yai kolesaga yao po wali

3 ¹Taitus, nago te nago tonalubo Godigo po wali pabo we bidi augwalibolo e po widu geao: augwali te gavman tuni bidi dabe dali genuai bidi dali dologode bidiyu, tama augwaligo po odolama te po wali pao. Tama tiyu tama augwaligo tigidali dwagi yai kolesaga yabo şe sisi eyu bidao, te po ola mao. ²Augwaligo bidi mede dwai po olamuo. Te menio. Augwali homu nagame elama, tama abagi homu eyu bidao. Tama sesemane sogo augwaligo tigidali we bidi dali te imilai homu eyu, tama augwali tau sao. Te po augwali ola mao. ³Magi baso meni. Polobadu da me, nage me da tigidali Godigo po odisabadi tama da te homu kolesaga meni yai bidi tiwai bidai dao. Tama dago me po sela şawai dao, tama tibo po odolama, tama dago pabo tçde geda muyu tama bilai dao. Tama bidibadi tama dena tigigo ebo haniani dwai kolesaga dali te tigi pusu ilibo şe me, te tobage şe ebogo da kalabus mu yai dao. Dago te bidi hasi dali dwai homu ebo kolesagade biliyu, tama dago augwaligo nai dabe pesa eyu yai dao. Tama bidi meba augwaligo da dali boi bidi eyu, tama dena hasi tomode me boi bidi naga elalua pai dao. ⁴Tiali goli, God aga da, te da ma dobola sabo bidi dao. Tama agai da dali yabo tau sabo

^b 2:14 Sai 19:5; Bom 4:20; 7:6; 14:2; Tib 130:8; 1 Pi 2:9

kolesaga dali, aga da godolo ebo kolesaga me, te si hania pedalali sogo, ⁵te sogo agai da ma dobola sai. Agai dago doloba pai kolesaga ebaso, tama agai da ma sabeo. Dago te doloba pai kolesaga ebeo. Aga digi da we bidi hobede mu ebaso tama da ma sai dao. Tama aga digi da aigo paluama, tama da gesi noma wai ma pedalai dao. Tama tiyu tama agai Mobo Bidigo da gesi noma bidibo ula mawai dao. ⁶Te Jisas Kraiss da, dena ma dobola sabo bidi, te agai seđe Godigo aga Mobo Bidi dabolo mu mawai dao, te bidi mego aı hauwa gea palobo tiwai eyu tama Godigo aga Mobo Bidi dabolo mani. ⁷Agai homugo da aga gedude doloba pai we bidi pedaliyu, tama te da tonalubo bidada pabo ula dago mu somainogo eyu agai dabolo aga Mobo Bidi mawai dao. ⁸Te po mu dao.

Tama eno homugo nago te po bommo elama ola mao, te Godibolo augwa homu tigidali mani we bidi augwaligo te ola mabo po dali homugo bugagia kone palama, tama augwaligo bommo elama te dwagi yai se eyu bidimainao. Dwagi yai se te dwagi yai page elalubao, tama te dwagi yai se ebogo te tigidali gasa we bidi dabe me tau sabo dao. ⁹Tiali goli te Godigo we bidi meba augwaligo te peni meni yai olo naide hanalua peyu te po wabo dao. Augwaligo te polobadu waı dabego nogide po weyu, tama augwa hasi wado po wabo dao. Tama te bommo yai pode konila ebo dao. Te tobage po wabo dabe nago gedelao. Dago koneani, te pogo da tau sogobeo, tama dwagi yai nai walobo menio. ¹⁰Niwai bidi agai te Godigo we bidi hani bugulubo po wabo bidi da, nago te bidibolo deli sogo me si sogo me te se tagalao po wao. Tama agai nago po odisabaso da, teda nago te bidi aga tudiba muao. ¹¹Nago koneani, tama tiwai bidi aga homu te gagea pai dao, tama agai ebo dwai sego aga te dwai bidi dao hania ola mabo dao.

Po silagasu wabo po

¹²Nosali eno Artemas me Tikikus te eno nage bidibo digi tagala palobaso da, te nage polo ena bidibo digi Nikopolis te hanuba asao. Magi baso meni, ena te Nikopolis bulude te dwai kedau sogo ena te bulude bidaibao, eno te homu daı wali.^c ¹³Nago te bommai po page koneai bidi nogi Senas dali, te gasa bidi me Apolos augwali si nago tau sao. Augwali si te gasaba painogo ebo si, tama nago augwalibolo te gasaba pabo tau sabo nai bugagia mao, tama augwali si bilibo nai tude menia sogobeo.^d ¹⁴Tama dago we bidi, te Krit tude bidibo Godigo po wali pabo we bidi, augwaligo te gasa we bidi tau sabo dwagi yai se ebo kolesaga koneao. Augwali tama tiyu da, teda augwaligo te nai meni yai we bidi tau sabo se ebo usu yaibao. Augwali te nai walisıabo ni tiwai bidilamuo.

¹⁵Te ena dali bidibo we bidi tigidali augwaligo nage dali siade dao, bugagia bidao, te po nagebolo ola tolobao, e pasgo. Tama te nage dali

^c 3:12 Tpi 20:4; Ef 6:21-22; Kol 4:7-8; 2 Ti 4:12 ^d 3:13 Tpi 18:24; 1 Ko 16:12

bidibo bage, augwali da dali deli homu eyu tama God dali konealubo po daų wali, te we bidibolo nago dago te siade dao, bugagia bidao wali po wao.

Eno homugo Godigo da olo tau sabo kolesaga dage tigidali dali bidao. Te tama dao.